




Худ велпаслатат ураҕан волаҕ нэман юкантса

Там дапатаан Артём Васильевич Лонгортов «Заслуженный работник рыбного хозяйства Ямало-Ненецкого автономного округа» нэман юкантса. Дув «Мужевское» сельхозпредприятие хоҕа рупитал. Худ велпаслаты мохет кутан мет каркамшак. Хольмаҕ педа вет тада йис, хоты там рупатайд тулды. Кашҕ тал лув артан худ велпасдал, тунял 11,5 тонна мас.

Артём Васильевич ядап тал тылащ 5-мет хатадн 1965-мет талн Мувкуртан сэма питас. Аңкел-ащел удман хуват тащн яңхсаҕан. Овкурт ашкуда етшаптамал юпийн лув таща рупитты манас. 1998-мет талн Мужевской рыбоучасток хоҕа худ велпаслаты питтас. Па ин там хатд унты МСП «Мужевское» хоҕа рупитал. Тащан рупитам талдал пидан ки арталаты – 34 тада йис.

Худ велпаслаты щирад шеңк яма уйтлалды. Ведщи ёхтам мохета потартал, хоты сахат туҕа-щира рупитты мосал. Мата панатан па хун, худ яма манал. Хоты сахат холап эслыты па сыхты рахал, мет шопаҕ вот



Хор: Анастасия Лонгортова

Артём Васильевич Лонгортов «Заслуженный работник рыбного хозяйства Ямало-Ненецкого автономного округа» нэман юкантса.

порайн. Сэвас па хоп нёл хоты катлыты. Щи веран энамты ёх, Артём Васильевич иты ищи артан



Ийимел па хидыдал пидан.

худ велпасладат. Мощатам худат кашҕ пуш тащан рупитты мохета китыдылайт, щи тумпийн лашкупата Пулцавта китты ураҕан мадайт. Кашҕ луҕ ийимел пидан Васька-лоран велпасдалҕан. Хоттёл хоятлал пидан талаҕ луҕ щита улдат. Ийимел пидан вет няврэм энмалсаҕан. Кат ай эвеҕалад Ямальской многопро-

фильной колледжан Пулцават вошан уталтылҕан. Худ велпаслаты ёх емаҕ хатдата хоттёл хоятлал пидан ёхтылдьыл. Вещката па туҕа-щира рупиттал ураҕан Артём Лонгортов район па округ элты мойлапсайт тайл. Муҕ там яма па вещьката рупитты хоятэва ищи мойлапса ясаҕ китлув. Тумтак ёш, тумтак кур! Ойҕа-пищаҕа, йисаҕа-нуптаҕа!

Еңкев манас — юшев путлас

Хащам дапатаан Ун Асан еңк нопатса. Ноптам юпийн ай куртата ун йиңк хуват мохты тынасты хопат ёхатсат. Куртаҕ хоятат куш кепа кум щитсат ялпа тувам лэтот лутты. Ёх хоятат велпас хардала вой па худ велпаслаты мантсат.

Там хатлатан кашҕ куртаҕ па вошаҕ хоят метеора билет лутты верытал. Ущ тылащ олаҕмет хатд вуш элты щутщаты манты хоятэв, верытал щутщаты манты. Кашҕ аңки-ащи нумасал, холта няврэмлад луҕ сус тутлыты. Хоты ястал Светлана Шурова Овкурт элты: «Муҕ ар пелак, куртэван улдылуд. Па мув суҕа яңхты кашев антом. Тухал ишан уншак няврэмлад

хоҕа Пулцавта па Мужи воша яңхилдылуд. Ин кат ай похем пидан ёлан улдам. Ийикем СВО хоҕа ул. Молха щутщаты китты вутщисаюв, ант мантсув. Муҕ куртаҕ хоятат, муцеван ёлан ямшак».

Доркурта па ёхды каматса хатд хайман яңхты рахал. Ванты, йи хатадан метеор Доркурт

унты манал, каматса хатд хайман па Касам-Нёда. Татьяна Тоярова па ястал: «Няврэмат уталтыты етшатёл юпийн ма няврэмлад пидан Пулцавта мандам, щита айшак похем ул. Щалта Новый Уренгой воша ун похем хоҕа. Эвем унт дор тылащан няврэмат пидан лагерь Питы щарс педа китлём.

Ин лув дапатмет класса манал. Туҕа-щира щутщал па, елды уталтыты кеншак питал».

Худ велпаслаты хоятлуд луҕ сус щутщатёл антом. Щишан няврэмлад пидан нопталты пандалан улдат. Няврэмлад иса нётлат. Куш кепа йиңк алдат, юх тулат, каш ураҕан холап валэмидат. Муҕ катра порайн ищи иса аңкилуд па ащилуд пидан усув, Ун Ас йиңкан полщемисув.

Йиңк хуват яңхилдыты юш пуншантам юпийн, кашҕ хоятэв ин мосты верал туҕматты верытал. Рутлал па ван хоятлал пидан уйтаныты, мойдантыты. Щишан, верыттан кеман, хошам муват педа, рут мув куртлана яңхаты, ямас щутщаты.



Хор: Альбина Тырлина

Ёлта китам хошам айкел

Вошаң па куртаң хоятат яха акташман, СВО харан улты ёхлув кеша, кашң хатл нётапса верлат. Кев сыд район хоятлув ищиты пуңадан ант хащдат. Хон мувев доват хоятат иты, ляль хара молты иса лэчатлат, акатлат, китлат.

Ёра вер туты имеңан-икеңан, Николай па Наталья Дмитриевңан 2018-мет талдан Чувашия мув сыд элты Охсар курта улты ёхатсаңан. Щита «Уютное» нэмпи шай йинщты па лэты хот пуншсаңан. Хул, нёхи па Овс мув вонцапсайт элты эплан лэотат кавартлаңан. Щи самаң хоятңан нётты па амат туты арсыр касапсаята па уйтантопсаята иса пилташилдан.

Там ванан па, куртаң мохидал пидан, ляль харан улты хоятлув кеша, лэотан тэкаптам ларащат лэчатсат. Мет олңа вурты рых пидан лант руватсат па нянь версат. Юхат няньдал ая эватсалдал па нох соралтсалдал. Ёшан верам нэпек хирыет, унтан актам торнат па лыпшат элты верам шайн тэкаптасдал. Шук лэотат па акатсат. Кашң ларащ лыпия, хус иты эвтам нэпек шукие понтсат, хота ёшан ханшман улда: «Сама мосты ям хоятые, тумтака ёхи ёхта. Муң лавдаслуд».

Ляль хар педа китам пормасат пидан, там ларащат па тусайт. Кашң даңкар посаң хоят, ёлта китам мойлапса ёша вуталдан, лыпел хошаман хувдал. Рутдал, ван хоятлаң нумалмал. Нопмсал рут мувал педа кердал. Курал-ёшад юран ёхатла.

«Мин ики сакңан хун там мува ёхатсаман, лув мохты самемана рахас. Куртаң хоятламан пидан ищи яха рахсуд. Рупата щиран ёра туты верэман лэчатсэман. Лэты хотэмана ванты, арсыр хоятат доңтыдат. Лув пидан улапса вер элты потрэмаман, верэв па елды манал. Щиты йи хатл, таңха йи номас



тайты хоятат яха акташсуд па номпсэв вератыйс. Яха потрэмисуд, шай йинщсуд. Кашң хоят, хой муй верытас, щит верас. Щиты ёдан актам, хошам айкел туты пормаслуд, СВО харан улты ёхлува китсуд. Куш кеша китам мойлапсайдува еша ат аматлат», – «Уютное» нэмпи шай йинщты па лэты хот куца нэ Наталья Николаевна ястас.

Зоя Куртямова ханшам потар

Хон мувев мир доватан касман аратыйс

Ас нопатты тылащ 10-15-мет хатлатан, Китай муван Первенство Азии пауэрлифтинг нэмпи касапсайд ханты айдат ху касас. Щи касапса щиран мет аршак лаварт карты шупат нох адамты мосал.

Кирилл Хартаганов Россия хон мувев сборная хоша доңман ул. Лув Питлор куртан ашкуда етшаптас. Ин Шадринской государственной педагогической университет хоша «Технология па информатика» щирн уталтыйл па кум шитман касты яңхал.

Айдат ёх кутан 53 кила унты, лув каматса мевал пос моцатас. Становая тяга щиран лув 197,5 кила нох адмас па 2-мет тахая этас. Лаварт карты шуп пидан ид омпысыдыман, 135 кила нох адмас па 3-мет местая хойс. Илта нох нёратман,



Хор: Кирилл Хартаганов

95 кила адмас. Аратал, лаварт картэт нох адамман, ияха понман 427,5 кила питас. Щи ураңна, арсыр хон муват элты ёхтам ёх кутан, Кирилл 3 места ус.

Ханты айдат похиева мойлапса ясаң китлуд. Пирыйм рупатаен педа яма уталтыя. Касты верэн елды самаңа туви, ёшен па курэн так ат ул!

Иван Сандрин ханшам потар

Тылащкем хул ант моцатла

Ёңк манам юпийн, Ас нопатты тылащ хусмет хатл вуш элты ущ тылащ ветхощъянмет хатл унты, холапан хул велдаслаты ант рахты питал. Щи вер такан ванты питла Таз, Ас па Пурпе ёханатан.

Матты хоят холап пидан ки моцатла: мохты нэпекат сут кеша лэчатлайт, ар охпи штрафан понлайт. Рахал туп пан питаран няшийн хул моцатман омасты.

Куртатан рупитты ураңан

Ущ тылащ 15-мет хатл унты «Земский тренер» щиран нэпекат китты рахал. Куртан муй па ай вошан рупитты лаңхаты хоятат йи миллион солкувайн мадайт. Щи кеша мосал вет тал рупитты.

Мосты нэпекат кашң хоят верытал лув ёра туты, почта хуват китты, муй па там электронной адрес хуват: sport@yanao.ru. Мосмитты хоятлуд округ вошлудан па куртлудан лавалдайт.

Алина Тоярова ханшам айкелдан

Музей верат туты нэ

Ас нопатты тыдац 18-мет хатадан Мир доватан улты йис пормасат шавиты хотат емаң хатлэд постасэд. Щи вер пела самаң хоят Ольга Самсонова 75-мет талпи сэма питам хатл постас. Љорвош район доватна лув йис пормасат ияха акатман рупитас.



Ольга Григорьевна Самсонова 6-мет хатл Ас нопатты тыдац 1951-мет талн, Няксимволь нэмпи куртан Сумат вош районан, сэма питас. Ашкуда етшам юпийн, лув мохты елды уталтыты манмал. Сус пора 1967-мет тал элты 1970-мет тал унты Межокружной культурно-просветительской училище хоца уталтымал. Щи тал элты нялъяң молтас тал уталтым ширал тувман рупитас па «Ветеран ЯНАО» нэм шитас.

Клубной работник щира уталтым юпийн, лув Красноселькупской район Сидоровск нэмпи курта рупитты китса. Щита еша кат тал антомшак куртаң каш верты хотан куца нэца рупитас.

Елды па, 1972-мет тал луң элты Васьеханов куртаң каш верты хот хоца куца нэца рупитты вохса. Щи пора элты лув Љорвош районэван пенсияя этты унты рупитас. Щита лув няврэмдал сэма питсат па энампсат, ин па хилыдал энмалты нэтал.

Йис пормасат шавиты хот лэцатман онтас верас

Васьеханов элты Мужы воша район доват каш верты хота рупитты китса. Худамлэм тал юпийн, 1976-мет талн, куцая понда. Щалта елды па лув Григорий Сергеевич Пузырёв пидан уйтантад. Лув пилэдан, 1986-мет талдан, Љорвош районэв доватан катра йис пормасат шавиты хот лэцатты питсаңан.

Григорий Сергеевич район доватан йис пормасат каншас, Ольга Григорьевна па



Ханты-Мужы куртан улты йис паварт хотат нох лэцатсайт.



Ольга Самсонова куцая рупитмал порайн.

СССР учёной хоятат пидан потремийс. Щи тумпина Литва, Латвия па Эстония муват этнограф хоятат пидан рупата щиран уйтантийс. Катра йис пормасат мир доватан Пулцаватан, Хон Петра вош Эрмитаж хоца па Нью-Йорк Метрополитен-музей нэмпи тахаятан, эталтысайт.

Овкуртан ашкуда хоца ищи ям музей удмал. Лувел нэпек щира яма мосмал лэцатты. Щишан, 1993-мет талдан, ашкуда музей районной историко-краеведческой комплекс хоца луңтасты питас.

Овс мув йис удапса шавиты хот лэцатман мет ар юр понман ус. Щи ураңан ар мосты нэпек па пормасат лэцатты моссат. Мет олаңна, Питдор куртан 1998-мет талдан, парк-музей лэцатса. Щалта па, 1999-мет талдан, Ханты-Мужы курта каслас. Щита щи ар рупата питас. Катра йис ханты улты хотат нох лэцатсайт. Ар пормасат районэв элты йи тахая акатсайт. Щиты кат щёрс молтас пормас, нэпек щирн, акатман ул.

2000-мет тал элты «Живун» нэмпи музей мойң хоятат акатты питас. Кашң тал щита вантапса харат лэцатылдайт. Кашң луң няврэмат кеша, «Нохраң пухар» нэмпи, щутцаты, каш верты па уталтыты лагерь лэцатыла. Щи тумпина тус ёшаң хоятат «Тусаң мув» нэмпи лота актылылдайт. Кашң порайн, хун мир доватат элты ун мойң хоятат ёхатлат – мохты «Живун» музея тутдылдайт.

Кашң емаң хатлат, «Ворңа хатл» па «Луң кутап хатл» нох лэцатман, Ольга Самсонова ищи юр поныдыйс. Ин лув, пенсияйн щутцаман удман, кум шитман, ищипа музей хоца ёхтыдыйл па муйн верытал, нэтал. Лув пилэдан рупитам хоятат иса ям ясаңан лувел нумлэд. Па елды лувел тумтака улты, шук ант ванты!

Иван Сандрин ханшам потар





Леонид Юрьевич Тохма, Ханты-Мужийн вулы ёх емаң хаталан.

Апраң, юраң пох энмадсаңан

Там ханты пох пидан ма тампуш Ханты-Мужи куртан, вулы ёх емаң хаталан уйтантысам па потрэмисман. Лув Охсар курт элты. Нэмад Леонид Юрьевич Тохма. Каматса ясаң рут хоятлад элты ястас: «Ма Пул ёхан элты. Аңкем-асем худ ведман Охсар курт пуңадан усан. Аңкем – Ольга Тимофеевна, асем – Юрий Михайлович Тохма. Ин пенсияйн сютсядқан, куртан улдаңан. Семьяеван вет няврэм. Ма кимет. Йи яй па хулам нэ апси тайдам. Ходыена атэл хоттэлаңат».

СВО едпи улапса

СВО едпийн, Леонид контракт сирн солтана манылдыс. Сит элты ситы ястас: «2015-



Хор: Альбина Тырлина

Опрасьдал иты Хон мувев апраңа сайдаслды

Там мосванан Хон мувев хуват Водаң Ляльн нох питам хатл постаса. Си палтап пора там хатл унты кашң хоттэдан уятла па нумда. Си Водаң Ляльн хон мув хоятлүв нох питсат, улты мувев па хоятлүв нох паятсат.

Там йисан, там пора энамты похлүв иситы си апраңа улты мувев шавилэд. Там хатлатан хон мув кашң таха элты ёх хоятлүв лялясты харан удлат. Там лопасан СВО харан улам ханты пох элты потрэм тулэм.



Хоттэл хоятлад.

мет талдан срочной служба сирн служитты мантсам. Си юпийн, одаң контракт ханшсам. Мурманск вош пуңадан Алакуртти куртан Арктической бригадайн служитсам. 2021-мет тал унты сита усам. Сялта ёхи ёхатсам. Еша сютсясам па 2022-мет талдан уйт дор тыдасян контракт нэпек СВО хося ханшсам. Сусан па мобилизация ус.

Наро-Фоминск вошан духсэм рупитас. Лув манэма нётас. Лапат сис нэпеклам акатсам па мохты Изюм воша мантсам. Одаң сита ляляссув. Вошев хаймев юпийн, Купянской направление хося хулам тал усув».



Леонид асед – Юрий Михайлович Тохма, апраңа па юраңа энмадтам пох ураңан, «Отец солдата» мевал посан мойлаптаса.

Ляль улам пора

Хоты ханты похев ляль харан ус, потаргас. Лялян одаң тал командной пункт шавийс. Сялта эвакуацияйн тал шуп ус. Сита улам улапса элты ситы ястас: «Эвакуацияйн улдем порайн, кашң хатл лялясты хар элты мушмадтам ёхлүв тутдысув. Сялта тал шуп «закрепат» лэсятсув.

Си юпийн, кат лапта уталдыты яңхсам. Муй сирн штурм вуты мосал, уталдасаюв. Си порайн, Синьковка курт нох паятты ураңан, тадаң тал ляляссув.

Ин ляль па сирн манал. Хун разведкая шимал хоят китла, ямшак, шимал хоят паратла. Си едпийн хут-лапат хоят яңхас. Ин хулам. Хасям талан БПЛА пидан рупитсам, дронат элдысам. Ялпа ёхатты похат одаң порайн, снарядат пидан рупитты палдат. Ма тохи понтсайм. Кашң хатл хольмаңкем «щицки» элдысув.

Ма пилэман улты хоятлам блиндаж хотан усат. Ма па атэл охсар вус лэсятман тайсам. Сита антом шеңк палтап холды. Хот лыпийн удман, шаңкап дронан эсалды верытлайн».

Шоши хоятэн ванан – самена кен па амат

Хасям талдан Леонид пидан куртаң ханты пох Иван Тяви служитты питас. Хун шоши хоятэн ванан – самена ям, яха кен па амат. Сит элты па каматса ясаң ястас: «Иван пидан мин ванан усман, туп атэл тахайн. Лув одаң «Барс» хося ханшлдантыты утсийс. Ма па лувел ма улам тахаема вохсэм. Лув ин холна лялясты харан ул. Ханты-Мужийн вулы ёх манам емаң хатлатан ёхтылдыс, кат лапта сютсаяты элдыса.

Лувел вохты едпийн, ма Воронеж вошан дронат элдыты ураңан уталдыты китыдысайм. Иван тохдаң хопат паятты ураңан, танк минайт элдыл, ма па айшак отат.

Районэв элты каматса ханты пох йи тахайн, антом яха, ван кутан усув. Лапатан кат пуш яха ёхтыдысув. Интернет тайсув, кутлүван ханшилдысув.

Муң штабев яма рупитас. Сисан сохан, лэтотан иса мийдысаюв, охан сохатпасаюв. Одаң талдан кашң тал шуп сютсаяты элдысайм. Ин сита улты хоятат туп кат лапта яңхлат».

(Елды 6-мет лопасан лунтадн)

Альбина Тырлина ханшам потар

Ляма ёхан мувн сэма питама ими

Щит ма ханты ими Аграфена Семёновна Сопочина (Песикова) элты потартлам. Лув ун кер тылац 13-метан сэма питама хатлад постас – лув 75 тада йис.

Там ханты ими ун кер тылац 13-мет хатадан 1951-мет талн Ляма ёхан хонаңан омасты Песиково унт куртан вой велты па вулэт тайты ху Семён Павлович Песиков хотн сэма питас, щита энмас. Лув потартас:

– Ма ханты Песиковат, Кантероват, Рынковат, Сопочинат рутат элты йилам. Лыв Ляма, Нохар, Юган, Аккын Явын па Вынга ёханат элты усат. Хунты хувн XIX-мет нупатн Пим ёхан элты Фёдор Кантеров опрацем Ляма ёхан мува каслас, щиты ма рутэм елды манас.

Лапат тада ювмалн лув Лямина куртан нулевой класса уталгыты манас, интернатн ус. Щалта елды Тундринна, Горный куртан хоца уталгытс, Сурханл вошн яң класс етшаптас. 1971-1972-мет талңанан Ёмвошн педучилища, щити юпийн 1972–1977-мет талатн Ленинград вошн Овс мир пединститут етшаптас. Икеңа йис па лув пилэдн Рига воша улты манас, щита 1977–1987-мет талатн шукацты няврэмат тайты хотн медсестрая-воспитателя рупитас. Лув щемьяедн кат няврэм сэма питсаңан. Мария Лаунонен эвел па хон пелак Финляндия мувн ул, Мартинс Галениекс похал па хон пелак арсыр муватн ус, ям арат тал Югра мувева ёхтыдыс па ЮГУ хоца уталгытс, ин Латвийин ул па рупитл.

Икел пилн катна манман юпийн Аграфена Семёновна рут мувала керлас. Тата Иосиф Антонович Сопочин хоца икия манас. 1987-мет тал вуш элты 1991-мет тал унты Рускинской куртан ай няврэмат уталгас. Па ипуляң Ёмвошн улты округ няврэмат уталтаты ёх институт хоца методиста рупитас. Щити порайн сурханл ханты ясаң уталтаты ураңан учебникат, словарят ханшилдыс, щити тумпийн уталтаты ёх ураңан нэпекат ханшас, муй щирн няврэмат рут ясаң уталтаты мосл. Щиты лув щити арат тал сыс 30-кем нэпек ханшас.

Щити тумпийн икел пилн Ным Тромаган мувн унт курталн «Ханто» нэмпи шоши мир община пуншас, щалта 14 вулы лутсаңан

па щити вер елды туты питсаңан. Лув ястас, 1970-мет талатн Нижневартовск па Ноябрьск вошңан унты карты юш талса, щити порайн щита улты хантэт вулы тайты ант питсат. Ин лув ащел щити вулы тац давалман ул.

А.С. Сопочина 1991–2017-мет талатн Ас-угорской научной институт Сурханл филиал рупатнека, щалта куца нэңа ус. Щити порайн ияха рупитты ёхлад пилн Сурханл район хуват йис потрат, мончат, арат нох



А.С. Сопочина ям пелакан лойл.



А.И. Герцен нэмпи хотан уйтантопса порайн. А.С. Сопочина ям пелакан омасал.

ханшман яңхсат, щалта мончат пилн киника эсалсат.

1997-мет тал вуш элты Сурханл госуниверситет хоца лэцатам «Рабочая группа по изучению проблем коренного населения» таха куца нэңа ус.

Аграфена Семёновна 2002–2008-мет талатн Сурханл район «Югра лыдңаптаты» тахайн куца нэңа ус. Щити порайн лув унт куртан улты хантэта мув илпи питы вой вуты ёх пилн тыйм нушайт туңматты нэңас. Ма нумлэм, ям арат тал ёхлы Сергей Васильевич Кечимов шуңат мув илпи питы вой вуты таха ёх пилн сутатты питас. Щити порайн А.С. Сопочина лувела сут хоца нэңас, лув

толмацтас, муй С.В. Кечимов потартал, ванты, щити ики руц ясаңан вевтама потартас. Елды Сурханл район «Югра лыдңаптаты» тахайн куца лув хилднэңал Вера Кондратьева йис. А.С. Сопочина лувел уталгаслы, муй щирн рут мирада яма нэңты мосл.

2016-мет тал вуш элты 2024-мет тал унты Аграфена Семёновна Сурханл район куца ху хоца улты округ шоши мир совет хоца рупитас. Щита ищити район хантэта сортат туңматты нэңас. Щити тумпийн лув ар вер верас, лудн район хоца ашкудаятан ханты ясаң урок ат хашас.

2025-мет тал вуш элты А.С. Сопочина Сургутской госуниверситет хоца улты шоши мир институтан эксперта ул, ин рут ясаң уталтаты ёх лэцатты нэтал.

Ешак Аграфена Семёновна, наң нуптэн 75 тада йис! Наң улапсаен хуват рут мирэн ураңан шеңк ар ям вер верлан. Муң наңена ун пумащипа ясаң ясталув. Найн-Уртан наң давалман ат тайлайн! Хув йис, хув нупат тумтака, ойңа-щуняңа уда!

Людмила Шульгина ханшам потар

Сорашак айкел моцатты ураңан

«Лух Авт» газета кашң лапат йи пуш этлдыйл. Тухал ишан, ёхаттал унты талаң лапат хаңал. Щити веран, сорашак айкелат моцатты ураңан, нынан мосал «Лух Авт» понылдыты айкелат «ВКонтакте» па «Одноклассники» хоца моцаттыты.

Щити ураңан там QR-код мохты лоңаты, па муң верылдыты айкелдува ханшлтытыты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан элты ищити нопсэв тыел-тохел понылдылэв, вантлэв – мата айкелат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понасан елды тулэв, ханты мир ясеңв шавилэв!



ОБЪЯВЛЕНИЕ

Там QR-код хуват лоңаты па вантаты, муйсыр нэтопсайт СВО хоца улты мохета мадайт. Щити тумпийн нэңдала, няврэмдала, аңкидала па ащилала ищити нэтопса вуты рахал.



ПОЛНАЯ ИНФОРМАЦИЯ ПО ТЕЛЕФОНУ
+7 (902) 816-11-90
+7 (34922) 3-98-08
ЗВОНОК ПО РОССИИ БЕСПЛАТНЫЙ

СЛУЖБА ПО КонтРАКТУ В ВС РФ

ВРЕМЯ ДЛЯ ВАЖНЫХ РЕШЕНИЙ!

КонтРАКТНАЯ СЛУЖБА
6 700 000 Р
ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КонтРАКТА НА ЯМЛЕ

Обучение:
✓ ОПЕРАТОРОВ БЕСПЛОТНЫХ ЛЕТАТЕЛЬНЫХ АППАРАТОВ
✓ ТАКТИЧЕСКАЯ БОЕВАЯ
✓ МЕДИЦИНСКАЯ ПОДГОТОВКА

3 600 000 Р
ДО 120 000 Р

400 000 Р
ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО

ОТ 225 Т. Р

Опрасьдал иты Хон мувев апраңа сайдасды

(Одаң шупал 4-мет лопасан
луңтадан)

**Апраңа ляляман,
мевалд посатан
юкантман ул**

Ханты похев ван хатдап тыдась 2024-мет талдан мушмалдса. Сит элты лув ант даңхаман потартас: «Сикущам, ёхи ёхатсам. Хун ар тал си вер сирн рупитдан, улапса педа па сирн вантдан. Сита наң пидэнан улты хоятдан хасьсат, наң па ёдан улдан. Иса си педа нумаслан.

Хун мушмалсайм, Подольск па Солнечногорск вошңан леккар хотан яммалсайм. Венш элты нёл щеламан хойсайм. Сэмеман щах ант ныса. Ин иса ям, сэмем хрусталикан верса. Шеңк тус ёшаң военной леккар хоятан операцияйн версайм. Унт дор тыдась 2025-мет талдан нэпекем вурты посан понтса, «В» категорияйн масайм па ёхи китсайм.

ГРАНТЫ ОТ ГУБЕРНАТОРА



Леонид па Алёна ийимел пидан округ элты хот дутты сертификатан масайңан.

Альбина Тырлина ханшам потар

Ин Пулңават вошан улдам, хот лутсам. «Защитники Отечества» фонд хося яңхсам, рупатайн каншлайм».

Леонид Юрьевич Тохма «За воинскую доблесть», Суворов орденан па Жуков медалян юкантман ул. Асед – Юрий Михайлович Тохма, симась апраң, юраң энмалтам пох ураңан, «Отец солдата» медалян мойлаптаса. Аңкел – Ольга Тимофеевна Тохма, вет няврэм энмалтмад ураңан, «Материнская слава Ямала» мевалд пос тайл. Си тумпийн, Леонид па Алёна ийимел пидан округ элты хот дутты сертификатан масайңан.

СВО хося улты ханты похлуд лялян удам верат элты шеңк ант потартлат. Туп хол, Хон мувев апраңа сайдалэд. Хол тумтака ёхи ат ёхатлат. Тадаң ёш, тадаң кур!

Ёрая рупитты па тынасты ёх уйтантыдат

Ас нопатты тыдаң 25-26-мет хатдотан Ноябрьск вошан «Дни малого бизнеса Ямала» нэмпи уйтантопса верда. Ямал мув доват элты ёрая па самаңа вер тайты хоятат ияха акатлайт.

Тамаң форум кашң тал, Ямал мув экономика департамент па Агентство «Мой бизнес» йи юр понман, лэщатыдэд. Тампуш уйтантопса Ноябрьск

вошан, «Миксер» нэмпи Арт-резиденция хотан, пуншда.

Ас нопатты тыдаң 26-мет хатадан Хон мувев доватан Ёрая рупитты па тынасты ёх емаң хатлэд постаты питлэд. Щи актациты па уйтантыты лотэд яммалтаты па таксарлаты Тал кеша понман ул. Щишан, программа щиран тамаң верат питлат:

– куран хухалты «Мой бизнес» в кроссовках. Ни дня без

движения» нэмпи касапса;

- тынасты «Здоровые решения для ямальцев» нэмпи вантапса хар;
- уталтыты хар;
- шоши пормас лэщатты ёх потрапсайт.

Там уйтантопса щиран ёрая рупитты па тынасты ёх уталтыдат, хоты лув вердал ротая, ямашак лэщатты мосад.

Иван Сандрин ханшам потар



Хор: Иван Сандрин



Хор: vk.com/satekhard_admin

СВО ляль хара нётап

Кашң хоят, хой муй щиран верытал, СВО нэмпи ляль харан улты хоятлува нётапса верал. Хой мосты пормасат акатал, хой холпат сэвал, хой па пошканат китал.

Герман Романович Сандрин тайм кат пошканал па 118 нёл лялясты хара китсалды. Хоты лув ястал, мет катра, йи турпи ИЖ-18 пошканал Юрий Неёлов уталтыты нэңал элты, 1999-мет талдан лутсалды. Шеңк кен па тус пошкан улмал. Кимет отад – вет пуш йи элты нёл эсалты «Сайга-12» нэмпи пошкан. Ёувидал Волно-

ваха элты ёхтылдым солтан пидан лялясты хара китсалды.

– Ма рутдам кутан ляль манты харан ар хоят ул. Одаң талдан щита ма ун опем хилы паратса. Щалда, тунял па уртэм антома йис, – Герман Романович ястас. – Па мув, атом солтанат педа, щикем ликем этал. Муя лув яма улты ант лытлайт? Ма нумастэман, мийм пошканңалам муң солтанлува нётап па онтас верлат. Атом ляль соращак ат етшал.

Альбина Тырлина ханшам потар

Ими Хилы па Меңкат



Хор: Любовь Возелова

Ими Хилы имед ими пидан катра ай хотые тайлаңан. Щи хотыенан улдаңан-холдаңан. Хилые – ай няврэм, туп ваңкидыты ловата йис. Щиты удтан-холтан элды хилыел ястал:

– Холпиты яңхдам ки – матты худ щи ведлам.

– Холта мандан, наң хонна ёшен юрды, курэн юрды. Холап па ант тайлан.

– Ащем тайм холап ад па ул?

Имед ими ястал:

– Яна па, вантты мосал.

Допаса яңхас, йи дал хуват ай холпие тус па ястал:

– Там уйтам холпем.

Ими Хилы ай холпал алэмасды, хир сохиена понэмасды. Наман ай хопие омасмал. Оляпан нэрам ай луплад алэмасды, хопа щи лэдамтас. Ас хуват щи манал. Вантал: едан лор ныла. Хопал сухталды ки, дора щи питал. Вуты катласас. Ай хопал сухтасды. Дора питас. Доран ай соймие уйтас.

– Я-а, – ястал, – щикем ай холпие ты сухталэм.

Холпал омасты питсалды: щикүш талад, щикүш талад, холпал соханты ошад антом. Холап камн сэм тайс, муйкем йиңка питал, худан лап хойла.

– Я-а, муй щи арат!

Холпал ант сохнас, нох вуты щи питсалды. Едан щи довалмас. Имомтыйн хопал лаварта ювемас.

– Инмунты щи кен ус, хопем па муя лаварта йис?

Ёхды аңкармас: Меңк ики няхман хопала щакмал, ёхды талад.

– Я-а, акем ики, наң па щимащ молты, хантнэху елды талад, наң нутку ёхды талдэн. Муй укщам! Талта луп алэмадам, саплэн шоппи хатщалэм.

Меңк икийн холап эслапса. Ими Хилы лэңки елды па щи таласты питас. Ин хопал па щи лаварта ювемас. Лупал алэмасды, Меңк ики саплал

элды хатщасды. Охал холт ракна. Хопа лэлас, ёхи манас.

– Имем ими, имем ими, юва, худан вуты тувалан.

Имед ими худлад вуты тусды. Хилэл олтал элды, шумах верас, вой палас.

Етная йис. Имед имийн нох куратла:

– Нох кила, етная щи йис. Молты лэва.

Ими Хилы нох аңкармас.

Я па, етна пелка йиты щи питмал. Дэсан-йинцсаңан.

– Мандам, худ ведты па яңхдам.

Холпал алэмасды. Холпал амуй соралтсалды, амуй анта. Ищи холпалдан холпиты щи манас, молхатад юшад хуват. Хопал сорам вур хуват сухтасды, вуты манас. Ай лорыенан йи дал хуват холпал омасты питсалды. Олдал ант па соханал. Па щи худан хойты питса.

– Я-а, пиращ имем ими матайл худ верман омасал, мета щи ведсам!

Хопал кутап унты худан тэкапса, ёхды довалмас. Па щи хопал сорам вур элды талсалды. Имомтыйн шаңкап хопал лаварта ювемас. Ёхды аңкармас. Кат охпи Меңк ики хопала щакмал, ёхды талад.

– Наң, акем ики, щимащ молты? Хантнэху елды талад, наң па, йивлап-аслап, ёхды холты талдэн? Щалта лупем алэмадэм, сапал довен элды хатщалэм. Охңалан холты ракандаңан.

Эслапса. Ими Хилы па щи хопал талты питсалды, па щи лаварта ювемас. Лупал алэмасды, Меңк ики саплал элды тувемасды, кат охңан кат тахая ракантсаңан. Щиталдан ёхды лэдамтас.

Калнаңала ёхтас, увалтас:

– Имем ими, юва, худан вуты тувалан!

Имед имийн худлад вуты тусайт. Хилэл олтал сус, шумах верас, вой палас, падам нянь шарытас. Щитлад етшасат, хилэл нох куратсалды. Ими

Хилы лэс, йинцас, холпал актатмас, ищи таха пела па щи манас. Молхатад иты холпал тэд худан хойса. Хулдал нох вусды, хопал худан тэктас, ёхды довалмас. Сорам таха элды хопал талсалды. Па щи лаварта ювемас. Ёхды аңкармас – худам охпи Меңк ики хопала щакмал, няхман лойл.

Ими Хилы ястал:

– Наң, йивлап-аслап, ёхды холты талдэн? Талта лупан воцкалэм! Меңк ики хоп холты эслапсалды. Ими Хилы хопал елды щи талдалды, щи талдалды. Па щи лаварта ювемас.

– Наң, йивлап-аслап!

Лупал алэмасды, ин от хатщасды. Худам охал худам тахая ракантсат. Щиталдан хопала лэдамтас, ёхи щи манас. Ёхи ёхтас, имед ими увалтас:

– Имем ими, юва, худан вуядан!

Хопал вуты талсалды, холпал тахартас, лэс, йинцас па ястал:

– Мета. Худам пуш худ ведты щи яңхсам! Ин па тахая яңхдам.

– Я-а, похие, муя мандан? Ёдан ула! Опращен, ащен ищи куш яңхсатан, ин хота уллат? – Имед ими ястас.

– Опращем – щит опращем. Ма па – ма.

(Елды па ул)

Любовь Возелова нэпека лэщатам монц



Велпаслаты пора

Тови порайн ищи матты ялап тал ёхатад. Муев нох вердал па ялпидыйд. Арсыр войт ёхатдат. Ёх хоятат тал сыс сопасдыйм нёхидал па хулдал холдат. Ищи рупитты порайн, кум шитман, вой моцатты янхлат.

Вулэң ёх тови порайн Кев тум пелка касалдат па щикут суюв омасты пора – няр нёхи хорты ант рахал. Щишан лув, ат лавалтыйн, патан пошкан нёл пидна тулат. Ат сыс васэт па дунтат моцатлат, ёхи тулдал – ялап элдаң лант кавартлат. Нёхи тумпина, васы караң пошхат тыхал элты дэты арат акатлат. Щит ищи элдаң дэтот. Няврэмат мет самаңа умащдыман дэлат.

Хул велпасты ёх ал щиты ищи ант омаслат. Еңк туп манам юпийн, мохты холап омаслат. Щи порайн ун сорат дората, послата доңдат. Кум шитман ищи васы орытлат. Кашң хоят ялап нёхи дэты дытал.

Хоты катра порайн вой моцатыса

Щит элты Вуювкуртаң ху, Николай Андреевич Сандрин, шуңат потартыйс: «Ма хоты ай тэдан нумлэм, хоты муң ащем, акидам, яйдам-апшидам пидан товийн вой велты янхилдысуб. Щи порайн пошкан волаң антом ус. Хой муйн верытас, щитан щи вой моцатыйс. Нумлэм, муң каскан



Хор: Иван Сандрин

Ханты хоятлуд катра тамиты васы моцатысат

хоца – хота ар пелак вой манал, щита вошам щелам талдуд па, манлуд васэт дорат элты пакнаптаты. Щи тохлаң войлуд волды тохи доңдат. Вошам, лавартал элты, ид раканал. Щалта тохлаң войлуд акатдалдуд па кашң хоята ортдалдуд. Муев ар вой ант мосас, туп дэты арат. Щи порайн, там йис хорпи потам хот антом. Холта щи арат вой тулэн? Ал шакал.

Опращдам катра улам куртэл васы нэм тайл – Вуювкурт. Кашң тови курт леп ар вуюв васэт ёхтыдысат. Щишан щиты куртэв нэматса. Юхат



Хор: Иван Сандрин

Николай Андреевич шуңат Катра Кев авт куртан

муң Катра Кев авт курта касалдусуб.

Нумлэм, хоты муң хоцаев олаң пошканат этты питсат: па мув элты ёхта хоятат туты питсат. Щи порайн ар пелак туристат. Щи сыс, ванты, пошкан тайты ураңна нэпек ант мосас. Нэмолты хоят пошкан нэпек ант тайс. Там пора иты ант вантса, ант валэмаса, муй хорпи пошкан тайдан па хоты лувел шавилэн. Хой верытас, щимащ пошканат лутсат. Хой нёхи сахат, хой хул сахат пелтацсат. Щи туристлан щутщиты ёхтыдысат. Кев лыши элты ты йисат, ёхи па тутаң хопан манты актащисат. Пошкандал муй елды патан алты? Тата щи хоятата тыныдысалад. Лув мувдала, ун вошата ёхатлат па, мосты порайн ялап пошкан лутлат.

Щиты щи муң хоцаев пошканат этты питсат. Щи порайн пошкан нуша ус.

Ин па там йис камн хорпи, муй рахал – щит верытла дапкая янхты па лутты. Туп мосты арат ох тайты мосал. Там йис дапкаятан васы, лунт па щицкурэк нёхи ищи тыныты питса. Щи онтасан вой велты ёх еша шимла йис. Унта янхлат ки, ал щиты, каш щиран, пора хайман. Муң па утлам хоятат, унта ки ант янхлуд – волды кашлы питлуд. Вошан муй юр ёхатад омасты, муң ай тэдан унта янхты уталдусуб. Там йис няврэмат, ар пелак, унта партлайт па ант манлат. Пошкан ёшан каталты ант хошлат. Ма нумастэман, кашң ёх няврэма вой велпаслаты хошты мосал».

Иван Сандрин ханшам потар



Хор: Павел Сандрин

Вуювкурт хащам хотат

Газета «ЛУХ АВТ»

Адрес редакции: 629003, ЯНАО, г.Салехард, мкр. Богдана Кнунянца, д. 1, каб. 106
+7 (34922) 4-68-63
E-mail: luh.avt@yamal-media.ru

Учредитель

Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д. 9, каб. 708)

Газета зарегистрирована

Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 164 тз

Подписные индексы: на год – ПА700, на полугодие – ПР561

№ 21 (1324)

Газета вышла в свет 23 мая 2026г.
Подписано в печать 21 мая 2026г.
по графику: 16.00
фактически: 16.00
Газета выходит по субботам

Цена годовой подписки 88 руб., в розницу не распространяется

Издатель

Департамент внутренней политики ЯНАО (629008, ЯНАО, г.Салехард, пр-кт Молодёжи, д. 9, каб. 708)

Отпечатано в АНО «Ямал-Медиа»
Юридический адрес: 629003, Ямало-Ненецкий автономный округ, г. Салехард, мкр. Богдана Кнунянца, д. 1, каб. 106
Фактический адрес: 629007, Ямало-Ненецкий автономный округ, г. Салехард, ул. Чубынина, д. 39А

И.о. генерального директора
АНО «Ямал-Медиа»
Лёгкий
Юрий Юрьевич

Главный редактор
Яковлева
Аллина Кирилловна